

12 NOV 1996

PENDIRIAN DR MAHATHIR DI SIDANG KEMUNCAK HARARE DIPUJI

NEW DELHI, 12 Nov (Bernama) -- Pendirian Perdana Menteri Malaysia Datuk Seri Dr Mahathir Mohamad yang menyatakan kebimbangan dunia Ketiga, pada Sidang Kemuncak G-15 di Harare, yang tamat baru-baru ini, mendapat pujian media India.

Dr Mahathir, "sejak awal pembentukan G-15, lantang menyuarakan kebimbangan Dunia Ketiga menghadapi cabaran sedunia dalam dunia pasca Perang Dingin," kata wartawan veteran, Nikhil Chakravartty, dalam ruangan ulasan akhbar harian berbahasa Inggeris "The Tribune".

"Walaupun Malaysia melalui ekonomi liberal yang hebat sejak lima tahun lepas, Dr Mahathir tidak ketinggalan menyatakan dan membangkitkan masalah-masalah yang melibatkan negara-negara membangun apabila negara-negara maju membentuk benteng perlindungan," kata Chakravartty.

"Semua ini dinyatakan oleh Dr Mahathir pada Sidang Kemuncak G-15 di Harare," kata Chakravartty dalam ulasannya bertajuk "Sidang Kemuncak Harare: Peluang Yang Terlepas."

Sebaliknya, beliau berkata: "Perdana Menteri India, Deve Gowda, terlepas peluang untuk muncul sebagai suara negara membangun yang layak diperolehi India pada sebarang perhimpunan negara-negara membangun."

Dr Mahathir dijadualkan melawat India bulan depan bagi menerima Anugerah Jawahar Lal Nehru. -- BERNAMA

MP NAK